



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Russia Tir Putin-i Dec. 5-6 anogotem
nung India semdangtsü

Tennis Hall of Fame 2026 atema
Federer nominate süogo



VOL. XXII ISSUE NO. 348 (ADOK 348)

DIMAPUR ROGONÜ (FRIDAY)

MONGPUTENI (OCTOBER) 03, 2025

₹ 5.00

Nagaland nung "non-Naga indigenous tribes" ji shirnok: NSF

Dimapur, Mongputeni/Oct. 02 (TYO): Non-Naga indigenous tribes mezüngokba asoshi aoksar, ta Rising People's Party (RPP) ajanga October 1, 2025 osang kaket nung adoktsüba ngua süngmanger, ta Naga Students' Federation (NSF) indang Inner Line Regulation Commission (ILRC) sangdong ka ajanga ashi.

Iba dak sendakba nung ILRC ajanga RPP nungi iba telangzüba aginer - Nagaland nung "non-Naga indigenous tribes" ji shirnok?

NSF asoshibo Nagaland aser Naga nunger aliba danga tesemtem nung lisopurji Naga nunger dang lir. Naga nunger aliba tesem balala nung danga kin arua aliba angateter. Saka aayanga aser takum jenjang tajungba nung alitsü asoshi tesem balala nung nemzüa senzür (migrants) dang lisopur ta ajaba ajanga item tesem nung akhi alemli nungi lia arur nüburtem asoshi tetsükdaktsü tulu agütsür, ta NSF ajanga ashi.

Alima nung lokti tematiba, United Nations-ia "indigenous" ya nisung telok ka pei alidak lisopur

jenjang wazüka ayutsü asoshi jangja-jangja ratetja lir, anungji pei li nung Naga nunger lisopur jenjang ka kecha agia mesamatsütsü, ta NSF ajanga ashi.

Anungji, iba dak sendakba nung Nagaland sorkari telemtetba agia aliba ta shidak lir, aser RPP-i iba telemtetba ya state indang ozüng yanglurtemi kanga mejungi agiba lir ta ashiba ya kodanga tim masü.

Iba yagi RPP mashi-malu tali jangjatsür aser Naga nunger senmanga aruba tasoli jenjang samatsütsü merangba lir.

December 1, 1963 masüidang yongi Naga nunger masürtem Nagaland nung arua alirtema lir ta onoki meteta lir aser aji shidak ta agizüker. Anungji sorkari dang parnok tem 'status' tapet agütsütsü ajungshir. Maneni December 1, 1963 masüidang aruba kija, kin mesüra nüburtem dang kuli tejangja maka jembiba nem memesüzükdaktsütsü saka pei temeden wazüka yua tasen arur mesüra pei agitsü jangraba nisungtem nem maisadaktsütsü ayongzüker, ta NSF sangdong ajangasa ashi.

Manipur nung mapa tajung inyakba pela agizüker: NPF

Dimapur, Mongputeni/Oct. 02 (TYO): Ukhrul district nung tajemzükba jenjang nung aliba tribal kibongtem asoshi ki tajung 1,000 yanglutsütsü sentong tenzükba atema tenüngsang agütsür, ta Naga People's Front (NPF) sangdong ka ajanga ashi.

Manipur Development Authority (MDA) aser tribal nisungtem ajangzüksü aser sen tajemba nung talitsü ki yanglyba nung rangloker Kerala nung aliba NGO, HRDS India ajanga iba mapa ya inyaker, koba ajanga maka-mait aser timtem agi

kongshir aliba kibongtem nem teimla agütsütsü, ta ashi.

44-Ukhrul AC nungi MLA Ram Muivah-i anir ibai inyakymyariiba aser nüburtem aser mapa inyakba agencies tsünga tawa aliba nung apu latsüba asoshia pelar, ta NPF sangdong ajanga ashi.

NPF-i Churachandpur, Kangpokpi aser Imphal Valley shilem kar densema danag hill district tem nunga iba mapa inyaktsü ajungshir, kong kin balala tsüngtarara adokba ajanga ki o jen raksatsür nüburtem tesem balala nung jenoka lir.



Tawa tanü tsünglu tanen makai aruba agi Mokokchung - Mariani road (NH-702D) tesem aika nung anentsüh aluba osang angazüker. Department ajanga anentsüh teimba ka yatokogo, saka Changki X-Junction anasa anentsüh tulu tesem asem shi nung alua lir, ibajibbo ano meintokteti lir, ta ashir. Anentsüh kanga tulu asünung, ibai yatoktsü mapang terabo agitsü, saka Oct 2nd nikongdang tashi nungbo lenmang lapoktsü merangtsü aser gari tilatembo Changki yim ajanga jajattettsü saka gari tulutembo mesenzütettsü, ta department ketdangtsür ka den jembidang pai metetdaktsü.

Nagaland nung SLL kübok mapa tamajung inyakba tali lir: NCRB

Kohima, Mongputeni/Oct. 02 (TYO): Nagaland nung Special and Local Laws (SLL) kübok 2021 aser 2023 tsünga 'cognizable crimes' tanemi timba akumer, saka Indian Penal Code (IPC) kübok ken o züluokbabo memelenshi kasa dang lir.

National Crime Records Bureau (NCRB) ajanga sayaba Crime in India 2023 report nung ashiba agi, state nung 2023 küm ken o 1,899 züluok, koba 2022 küm 1,592 aser 2021 küm 1,478 liasü aser ibai küm asem nung shilem 28 shi timba akumba alitsü. State nung IPC crimes ya 2021 nung cases 1,033 liasü, 2022 küm 1,008 aser 2023 küm 1,050 liasü. IPC crime rate per lakh population ya 47.0 lir, koba national average 270.3 nung lir.

Nagaland nung 2021 küm nisung tepsetba ken o 14 aliba 2023 küm 19 liasü aser 2021 küm nisung pua bener aoba ken o pezü aliba 2023 küm ana dang liasü.

2023 nung nübur sunepa aliba anema mapa tamajung inyakba ken o 138 liasü, yangji lokti tulu adenshia rongrongshirongba aser temelaba makai lokti adenshiba densema lir ta report ajanga ashi.

2021 küm SLL crimes 445

liasü, 2022 küm 584 aser 2023 küm 849 liasü, ta report ajanga sayur.

Ibai küm asem nung shilem 91 tali akumba lir. Item ya timba excise, narcotics aser local administrative laws dak sendakba lir.

Nagaland atema SLL crome rate ya 38 per lakh population lir, ajisiüka national average (178.0) dang kanga agi tajemba.

State nung tetsür anema mapa tamajung inyakba kangabo mali, kechiaser 2021 küm tashiyim amshia shi nung medemba ken o ana, 2022 küm ka aser 2023 küm yamaji inyakba asem den nisung shibelenba ka liasü.

Nagaland nung tetsür anema mapa tamajung inyakba ya 0.3 per lakh women population aser national rate 66.2 lir.

Tanur anema mapa tamajung inyakba kanga ajema lir, kong 2021 küm iba ama mapa tamajung inyakba ken o ana, 2022 küm ka aser 2023 küm IPC ken o ka liasü. Ajisiüka Juvenile Justice Act kübok 2023 küm ken o 16 liasü saka küm asem tsünga POSCO Act kübok ken o kata meliasü.

Ano Nagaland nung

SBM ajanga district ajunga nung temelenshi ajiteter: Minister Jacob

Dimapur, Mongputeni/Oct. 02 (TYO): Swachh Bharat Mission (SBM) ajanga state ajunga nung mürekmejuba tsütsü terenlok kanga lir, ta Minister, PHED & Cooperation, Jacob Zhimomi-i ashi.

Dimapur nung Swachh Bharat Diwas den repsema Swachhata Hi Seva campaign 2025 tembangba sentong ka Brehostibarnü agidang, Swachh Bharat movement yimdak-yimtsüng tonga bener aoba, libajen müreka ayutsü tongtipang ta nüburtem nem angatetdaktsüba nung yarir ajunga nem Minister Jacob Zhimomi-i tenüngsang agütsü.

Swachh Bharat Mission flagship kübok department-i Individual Household Latrines

9,000 dak tema yangluogo. Iba ya ajanga Nagaland ya Open Defecation Free (ODF) state ta October 2, 2018 nung sangdong, koba national deadline 2019 dang tama lir, ta pai ashi.

Tanü iba movement ajanga temelenshi bener arutsüba ya state nung district ajunga nung ajiteter, anungji Swachh Mission ajanga central sorkar agenda sayur.

Linük asoshi ODF Plus jenjang tongtettsü asoshi nüburtem tesendaktep, mongintem shisatsü agitepba tenzüka lir. Ibai central sorkar indang mangdang lir, aser asenok lenmang shidak nung otar, ta Minister Jacob-i ashi.

Ajisiüka state tanünga den külemi iba nükjidong tongtettsü

technology dak sendakba aser senotsü tsütsü mapa tamajung inyakba timba akumer, kong 2021 küm cybercrime ken o ana, 2022 küm pezü aser 2023 küm trok liasü.

Economic offences (cheating, fraud, forgery) ken oa timba kuma 2021 küm 15 aliba 2022 küm 22 aser 2023 küm 27 liasü.

IPC ken o tem nung property crimes shilem tuluka lir, koba 2021 küm 1,500 shi aliba 2022 küm 1,700 aser 2023 küm 1,851 liasü. Auyaba indang ken o timba lir, ta report ajanga ashi.

Arms Act aser Explosive Act kübok 2021 küm aibelenba asem, 2022 küm ana aser 2023 nung ka-ka liasü.

2021-23 mapang teintet rogo, SCs/STs, libajen, bendanger-i/ bendanger dak mapa tamajung inyakba, taila sen apuba meliasü.

2023 küm Nagaland nung ken o ajak agi 1,899 liasü aser Northeast nung medemdangra Arunachal Pradesh nung 2,941, Assam nung 64,959, Manipur nung 20,283, Meghalaya nung 3,532, Mizoram nung 4,050 aser Sikkim nung 718 liasü, ta NCRB ajanga ashi.

asoshi tekeraba nung inyaktsü nüngdaker, ta ashi.

Paisa Swachh Bharat Mission kübok sentong aser policy balala takok ngua inyakba nung department-i shilem tulu agiba atema tenüngsang agüja liasü.

Iba campaign takok anguba ya asen nükjidong tongtetba kisüng masü saka nübur ajunga asoshi mürekmeju, health aser akhum agütsütsü asoshi bendanga agütsür inyakba kuli lir, ta Swachh Bharat Mission-Grameen, Mission Director Er. Gwatilo Tep-ia ashi.

Nisung ajungai tanen makai yaritepba aser amalitep akaba ajanga temürekba aser tajungba lokti asoshi iba mission maneni takok angutsü imlar, ta pai ashi.

Youth Association Aongza Ward, Mkg tenteter küm 25 jungogo

Mokokchung, 02 Oct (TYO): 2000 küm Youth Association Aongza Ward (YAAW), Mokokchung tenteter küm 25 ajungba jubilee sentong "rooted in strength, soaring to greatness" omen dak rangloker 1st Oct, 2025 nü Aongza Ki, Mokokchung nung ayongzüka takok ngua mungogo.

Iba sentong nung tongti tesemdang, Nagaland RD & SIRD Minister, Metsübo Jamir-i jembidang, Aongza ward ya lenir aser tashi temeteter adokba mepu ka lir, Tsüngremi balaka meima moatsüba ward ka aser tanga ward-temi ranglokba ward ka lir, anungji, tang amai teti lungjema

aser putepa lidaktsünür, ta metetdaktsü.

Mezüng lenirtemi kechi nükla yur YAAW tentet, ibaji angateta ano taruba 50 atongdangbo tang dang nungi jenjang tajungba inyakteter amungtsü nükjidong ayutsü pai ayongzü.

Iba kiyong nung lanurtem aika politic tsütsü kangabo mejangrar, iba tetezü shinga daka nendaka meli-i pei sasa mapa meranga inyaker tepok sünga alitsü merangba ajiteter, shiri yamaji alitsü meranger parnokji shinga talenba küboki mair, ta paisa Aongza lanurtem tenüng sanga ashi. "Küm 25 ajungba tetezü joko YAAW ya tanur masü, anungji,

tali akangshia, putepa, ochi shia ano tajungba inyaktsü maneni ajungshir", ta paisa shisem.

Paisa lanurtem dang melenshidaktsüba o kar lemsatepdang, tanü phone wara yagi lanur kanga mejungi kongshia lir, phone ji adianu aser medemer dang taoba yimteter alir aika lir, iba mopungsem yagi lanurtem dang masü tsüraburtema mejenbur. Phone adokba ya asenok asoshi temoatsü tulu lir, anungji, iba temoatsüji tagi shia agitsüla saka phone ya asen adianu masü oset ka dang asünung, awashi meteta amshitsü ayongzü.

(Maneni tapak 2 nung...)

FAC aser Sherubtse college na academic & cultural exchange sentong tenzükogo



Dimapur, Mongputeni/October 2 (TYO): Fazl Ali College, Mokokchung aser Sherubtse College, Royal University, Bhutan na tsüngda anogo asem asoshi Academic & Cultural Exchange sentong October 1 nü tenzükogo aser 3 nü tashi agitsü.

Iba sentong nung Assoc. Professor, HOD Dept. of Sociology Dr. Adangla Changkija-i anir Fazl Ali College nungi kaketshir aser faculty 18-i shilem agidar.

'Strengthening Bond Beyond Borders' omen nung ajemdaker student-faculty exchange sentong ya sobaliba balala angazükteptsü, shisalayim nung longjemer inyaksü aser riju ana tsüngda arok tangatettep asoshi kanga tongtimbang lir. Sentong ya academic tsütsü

tajangshibatem jenjang ajungkettsü, Bhutan aser India na tsüngda shisalayim nung tesendaktep akangshitsü aser kaketshirtem alima senso kaka akümtsü asoshi ajungmesotsü nükjidong nung ayongzükogo. Sherubtse College aser FAC na telongjem ya shisalayim nung temaba jenjang atongtsü merangba aser sobaliba melentepba angazükteptsüba dak tera yangloka lir.

Mezüngbuba anogo host college-i, Bhutan biodiversity aser linük carbon negative ayutsü merangba indang lemsatep. Sherubtse faculty-i, linük ecology koda takar aser koda wazüka ayur iba indang lemsatepa Bhutan ya sustainable development nung lenir ka ama parnok tenüng tajung indang metetdaksü Kasa mapang nung FAC

faculty Dr. Temjennaro-i, Nagaland nung Higher Education dak sendakba nung NEP 2020 indang presentation ka agütsü, Dr. Adangla Changkija-i Nagaland nung takar sobaliba, sobaliba inyakyim (taoba aser tang) indang lemsatep aser Dr. P. Tiatemsu-i Aoer tem ethnobotanical inyakyimtem indang metetdakja liasü.

Iba sentong ya academic dak sendakba nung kati ka semdangtepba dang masü saka kati ka angatettsü, akhümtsübuttsü aser shisatsü lemsateptsü atema apu alatsü asoshi tongtimbang jenjang ka agiba lir. Iba amala telongjem ajanga arrtsü adena or bilemtsü, Bhutan aser India na tesendaktep akangshitsü asoshi college anapronglai kaketshir aser faculty tem ajungmesor.

Painting workshop & tetoktepba ka agiogo

Kohima, Mongputeni/October 2 (TYO): Department of Art & Culture, Nagaland-i ayongzüka anogo ka atema painting workshop aser tetoktepba ka agiogo. Iba sentong ya Seva Parv - Vision of Viksit Bharat' omen nung ajemdaker State Academy of Music & Dance Kohima nung September 30 nü agiogo.

Sentong nung alakteta jaoker ama o jembiba mapang nüngtugu artist aser Arts (2012) dak sendakba nung tetushi Governor's Award ngur alisang Vilalhou Noudi-i ashiba agi, Tsüngremi nisung ya imagine asütsü sempet agütsür yaglu, koba creativity atema kanga

tongtimbang hadir ka lir. Iba sempet balaka agütsüba ajanga meimchir kijai tazüngla nungi langka tebor tajung ka yangluteter ta ashi.

Sentong nung Asst. Archivist Temjenjungla Aier-i, okila jembiba aser Director, Art & Culture Department Adela Moa-i takok angur tem sangdongba den sempet lemja liasü.

Jo Foundation Inclusive School nungi Jongpen Pongen-i iba tetoktepba akok aser pa nem senpet sen 10,000 agütsü aser Ministers' Hill Baptist Higher Secondary School nungi Bautuk S. Phom aser Fernwood School nungi Yohulu Medeo na tanabuba aser tasembuba

jenjang nung liasü. Tena nema senpet sen 5000 aser 25000 agütsü.

Consolation sempet sen meyrejang kaka, Stella Higher Secondary School nungi Wangoi Büchem, Mezür Higher Secondary School nungi Sangke Mansha aser Fernwood School nungi Medole nunger nem agütsü.

Ajak senteper school teku nungi kaketshir 87-i iba sentong nung shilem agia liasü. Kaketshirtem nem art asüdag amshiba osettem agütsü aser parnoki 'Developed India by 2047' omen dak ajemdaker parnok tebilemba art ajanga sayua liasü.

Mokokchung nung State Handloom Expo ayonger

Dimapur, Mongputeni/October 2 (TYO): Nagaland Handloom & Handicrafts Development Corporation Ltd. (A Govt. of Nagaland Undertaking) Dimapur, Nagaland-i October 16 nungi 29 tashi Town Hall, Mokokchung nung State Handloom Expo (HathkarghaMela) ka ayonger.

Application benoktsü atema tatembangbuba anogoji October 10, 2025 asütsü. Iba Expo ya Development Commissioner (Handloom), Ministry of Textiles, Govt. of India, New Delhi-i sponsor asüba sentong ka lir.

Expo nung shilem agitsü janraba Co-operative Society, Producer company, SHG, Federation, Apex Society, silk weavers, Jute Artisans aser

KVIC tem densema Handloom & Handicrafts agency temi iba sentong nung shilem agitsü atema Project Cell, NHHDC Ltd, Half Nagarjan, Dimapur dangi apply sütettsü.

Apply asüba mapang address, Mobile Number, IFSC code dena Bank A/C No tejangja benoktsüla. Iba den külemi pei stall tem nung sayutsü atema osettem indang noksa kaka agüja aliba anogo tashi nung office mapang benoktsü metetdaksüogo.

Stall ajak ya angati asütsü aser NHDP guidelines kübok jenjang agüja aliba ama lumpsum TA/DA/asfer Freight charge tem agütsütsü, ta Managing Director Er. Y. Lipongse Thongtsar-i metetdaksü.

Food Safety Task Force-i Hotel aser restaurant meitaao

Dimapur, Mongputeni/October 2 (TYO): EAC (Revenue) Khriethozo-i anir Food Safety dak sendakba nung Kohima District Task Force-i September 30 nü yimti nung hotel aser restaurant balala meitaago.

Food safety standard tem sülen tashi anga anidakdaksütsü aser tang inyakyim benoka inyaka aliba nung shilem ka ama Iba team yagi hotel pongu aser restaurant 25 semdang.

Meita aoba sülen restaurant ti nem Food Safety and Standards

Act, 2006 kübok Section 32 dak ajemdaker Improvement Notices agütsütsü, kechiyong parnoki merekmeju aser safety dak sendakba nung tenügdakbatem metongtet.

2024 küm Improvement Notice agütsür aliba restaurant ka tetuyuba sülen manidaki ano merekmeju mesüi inyaksangshia aliba ngutetogo. Anungji ketdangsürtemi iba restaurant indang licence thitsütsü telemteba agiogo aser October 3 nü official kaket agütsütsü.



India lima ajunga nung 1st October nü 'National Voluntary Blood Donation Day' amungba den külemi Dr. Imkongliba Memorial District Hospital (IMDH) nunga Mokokchung Voluntary Blood Donors Association aser Blood Centre Mokokchung na senteper kasa azü tenlaba sentong ka ayongzüka akadang tongti tesemdanger Mokokchung Dy. CMO, Dr. Takosunep den shilem agia adenertem külemi tangokba noksa nung angur. Taküm omenji "give blood give hope, together we save lives" liasü aser iba sentong nung Nagaland University Lumami, College of Nursing IMDH, Marwari Community nungi densema temulunger parnok 12-i azü tenla. Mokokchung, 1st October, 2025.

Youth Association Aongza Ward, Mkg tenteter...

(TAPAK 1 NUNGI...)



YAAW Jubilee sentong nung tongti tesemdanger Metsübo Jamir den shilem agirtem, Aongza ward yimden, YAAW ketdangpurtem aser Jubilee asayamayang luden pur külemi tangokba noksa nung angur. Mokokchung, 1st October, 2025

Tanü alima nung kakets shisatsü bushiba ya shisatsü angazüktsü (empowerment) asoshi dang lir, saka azüngbaji mapa ka angutsü (entitlement) imla-a mazüngtsüla, tazünger ajak mapa angutsü ta mali. Tanü lanurtem degree tululu züngteper mapa angutsü asoshi tsürabur dak imlaba yabo maaksü lir. Tsüraburi meranga

züngdaksükaji pei sasa tatidang balala agüja merangtsüla mesüra pei sasa mapa meranga inyaker chiyungtsü asoshi lenmang bushitsüla, ta paisa lanurtem ayongzük.

Tongti o jembir Department of Anthropology, Nagaland University nung Asst. Prof. Dr. Tiasünap-i "rooted in strength, soaring to greatness" omen

dak ajemdaker teshidangtsü onük tajung aika bener arua tesentepertem ayongzüka jembir.

YAAW, Silver Jubilee amungba nüngtem bangzüng ana (2) renema yuogo. Mezüngbuba nung, lanurtem tashi itta kinük pezüsü liru medema renloktsü asoshi saisabong (games & sports)

aser music and art tsütsü mapangaben sentong balala ayongzüka akatsü lemtet. Tanabuba nung, lanurtem mapa manguba tebilemtsü dak sentakba nung pei sasa meranga inyaker tepok sünga litettsü maongka lapoktsütsü asoshi YAAW-i mapang shia nüngdakba apir tapet shisatokden sentongtem ayonga akatsü lemtetogo.

YAAW Jubilee nüngtem nung adoktsü aliba nungyu kakets ka Nagaland Minerals and Mines Managing Director & Proprietor, Temjenmoa Jamiri sayatsü. Mokokchung Town Baptist Arogo Pastor, Bendang Jamiri Aongza lanurtem atema temoatsü meshia sarasademtsü. Jubilee nüngtem nung Aongza Ward nung alir rongnung tambuti tsürabur Lanutsülak (Waromung) arishi küm 95,

aser tantsütila tsürabur Karilula (Mangmetong) arishi küm 89, tena nem aküm agüja senpet kaka agi tushi.

Tanü iba sentong nung YAAW president – Talisunep Ozukumi tarur pelaa agizük, Aongza Ward Chairman – R. Longritemjen Aoi jubilee salem lemsatep, YAAW mezüng president – Toshimereni menungraba o kar lemsatep, Dr. I. Wati Imchen-i bangzüng zünga metetdaksü aser planning committee convenor – Dr. Aoyimsen Jamir-i melepzüng o jembir. Aongza Youth Fellowship, MTBA Youth Ministry aser Imtikumla Imchen-i ken ajanga tesenteper ayongzük. "An evening of Aongza" ta sür Jubilee nungtem aonung kentenmenü benjong ka liasü aser iba nungji MMC Councilor, Imtiyapang tongti tesemdanger liasü.



October 02, 2025 nü Parliament House, New Delhi nung Ato kilonser, Narendra Modi aser Lok Sabha Speaker, Om Birla na dang cabinet minister temi Mahatma Gandhi asoba anogomong nung asür nem akhüm agütsüba sülen tangokba noksa nung angur.

Oct 14-16 anogotem nung India nung UNTCC senden akatsü

New Delhi, Mongputeni/ October 02 (Agencies): October 14 nungi October 16 tashi Indian Army-i New Delhi nung United Nations Troop Contributing Countries' (UNTCC) Chiefs Conclave ayongzüka akatsü, ta Ministry of Defence-i metetdaksü.

UN Peacekeeping missions atema sepaitem lemzüksüba linüktem tsüngda tesendaktep tajungba akümtsü nükjidong nung UNTCC Chiefs Conclave ya ayongzüker.

Iba senden nung sepaitemi asalentong, training agiba tasa aser yimjung atema inyakba onüktem nung shisa lemsateptsü.

Iba senden nung UN peacekeeping atema sepaitem nem shilem agidaksüba linük 30 nungi sepaï tongti

ketdangsertem adentsü. UN peacekeeping mission atema sepaitem lemzüksüba linüktemji Algeria, Armenia, Bangladesh, Bhutan, Brazil, Burundi, Cambodia, Cote D'Ivoire, Ethiopia, Fiji, France, Ghana, Indonesia, Italy, Kazakhstan, Kenya, Kyrgyzstan, Madagascar, Malaysia, Mongolia, Morocco, Nepal, Nigeria, Sri Lanka, Tanzania, Uganda, Uruguay, Vietnam aser India linüktem lir.

1950 küm mezüng UN Peacekeeping mission tenzüka sülen operations 49 nung India-ia sepaï India 200,000 dak tali yokogo.

Tang UN Missions balala atema India-i sepaï 5,000 shi yoka lir. India nunger sepaitemji tang South Sudan, Democratic Republic of Congo

aser rara aliba tesemtem nung yoka lir. UN peacekeeping operation balala nung tang tashi nung India nunger sepaï 179 süogo.

New Delhi nung UNTCC Chiefs Conclave ayongzüka agitsü aliba dak sendakba nung Bodhbarnü New Delhi nung aliba Manekshaw Centre nung jeli sentong ka ayongzüka kaogo. Iba sentong nungji Lt Gen Rakesh Kapoor, DCOAS (IS&T)-i okila tatsüka jembia liasü.

United Nations Troop Contributing Countries' (UNTCC) Chiefs Conclave nung adentsü atema India-i kidanger linük ana- Pakistan aser China nabo mejaok ajisüaka Bangladesh, Nepal aser Africa nung aliba linüktembo jaokogo.

Russia Tir Putin-i Dec. 5-6 anogotem nung India semdangtsü

New Delhi, October 02 (Agencies): December ita mezügbuba hopta nung Russia Tir, Vladimir Putin-i India semdangtsü aser küm shia ayongzüka agiba 23buba India-Russia senden nung adentsü, ta ketdangsertem osang ka ajanga metetdaksü.

India aser Russia nati iba sendenji December 5-6 anogotem nung ayongzüka akatsü atema jembidar. Taruba ita Russia foreign minister Sergey Lavrov-i India semdangtsü aser 23buba India-Russia senden atema sentong renemtsü.

Brihostibarnü Moscow nung India deputy NSA, Pavan Kapoor-i, "December ita nung Putin-i India semdangtsü aliba

atema onoki renemdar. International sentong balala nung linük ana nungi lenirtem ajurua iba atemaji jembidar," ta metetdaksü.

2022 küm February ita nung Russia aser Ukraine tsüngda rara tenzüka sülenbo tang mezüng Putin-i India semdangtsü. Pai tesüsabuba India semdangbaji 2021 küm December ita nung liasü. Iba mapang nungji India-Russia senden nung pai shilem agia liasü. Küm shia iba senden ya linük ana nung melentepa ayongzüka agir.

Yaküm July ita nung Ato kilonser Narendra Modi-a Moscow-i oa India-Russia senden nung shilem agia liasü. Yaküm ayongzüka senden

nungji Modi-i Putin dang, tongbang raraba tesem nung onük kecha mebentettsü, anungji Russia-Ukraine tsüngda ken o jembiba ajanga mangatettep ken o bentettsüla, ta metetdakja liasü.

Taoba SCO senden nunga Modi aser Putin na Putin indang gari telung nung minute 45 shi sensaksema liasü. Iba mapang nungji lenir anati linük ana tsüngda shishilembaba, energy, connectivity aser joint defence manufacturing sectors nung tesendaktep atema jembia.

Bodhbarnü India aser Russia na tsüngda senden ka mena Pakistan aser Afghanistan na dak sendakba onük aser region nung security atema jemiogio.

Tang mezüng India nunger senjang nung 'Bharat Mata' ajenlokogo

New Delhi, October 02 (Agencies): Rashtriya Swayamsevak Sangh (RSS) küm 100 ajungba Centenary nüngtem nung Bodhbarnü Ato kilonser Narendra Modi-i senjang tasen aser postal stamp tasen sayatsüogo.

Tang mezüng India nunger sen nung 'Bharat Mata' noksa ajenlokogo.

Senjang 100 (? 100 coin) nungji tip külen linük 'insignia' lir aser tip külen Bharat Mata den Swayamsevak züngsemtemi la matsüngdang apudaka akhüm agütsüba noksa lir.

Iba sentong nungji jembidang Modi-i, "Linük nüchiso anguba sülen tang mezüng India nunger sen nung Bharat Mata noksa adoker; iba ya nümatangtsü mapang ka aser puti otsü mapang ka," ta metetdakja liasü. Senjang nungjisa RSS omen

"Rashtray Swaha, Idam Rashtraya, Idam Na Mama" ajenoka lir. Iba tetezü "Linük nem ajak bendanga agütsür, Ajakji linük meyong, Kü meyong kecha mali."

RSS Centenary sentong nungji Delhi Chief Minister Rekha Gupta, Culture Minister Gajendra Singh Shekhawat aser RSS General Secretary Dattatreya Hosabale nungera liasü.

Ano postal stamp tasenba nungji 1963 Republic Day Parade nung RSS swayamsevaks-i shilem agiba noksa lir.

1925 küm Keshav Baliram Hedgewar-i Nagpur nung RSS ya volunteer-run organisation ama tenteta liasü. Narendra Modi-a yimtenren nung majemokdang RSS 'pracharak' ka liasü.

Sorkar mapa nungi mejendoktsü atema tsüraburi tanur ka sendok



Kinü tanur tsüraburtem- Bablu Dandoliya aser Rajkumari Dandoliya na noksa nung angur.

Bhopal, October 02 (Agencies): Madhya Pradesh kübok Chhindwara district nung arrshi anogo asem kinü tanur tebur ka arem nung atentena jepa lia yimdaklir kari kümzü.

Nandanwadi arem nung kinü tanurji lung ka kübok angu. Tanurji aonung piyong shiruru agi metepa aser sükseta sangwadaktsü. Anepdang züngia yimdaklir kari kinü tanur ajepba olaji angashiba sülen tanurji kümzü.

Yimdaklir kati, "Mezüngbo onoki ibaji shiruru südi ta bilem, ajisüaka tonga aodang onoki kinü tanur tekaji angu. Tsürabur shingaia yamai meinyaktsüla," ta ashi.

Police-i ashiba agi, sorkar school nung tesayur Bablu Dandoliya aser pa kinüngtsü Rajkumari Dandoliya na tanur pezübubaji September 23 anepdang soa liasü.

Sorkar temzüng kübok sorkar mapa inyakterem dang tanur ana dak tali masotsü ajungshir, anungji tanur tali sora pa sorkar mapa nungi jendoktsüa akok, ta bilema tenati mashisa akümbaji mimshia aru. Ajioda September 23 anepdang tanur asoba sülen tasemnübuba nung tenati kinü tanurji arem kati anir aoba sülen pasasa südaktsütsü atema

lung ka kübok yutsü.

Chhindwara district hospital nung doctor temi, "Kinü tanur dak meja-i kanga meteper liasü aser temang temperature kanga ajemer liasü. Pa taküm kümzüka ya tesümgangtsüka lir. Kinü tanur ka aonung piyong arem-min nung sükseta süidaktsüyonga taküm kümzüka ya tesümgangtsüka lir," ta metetdaksü.

Bharatiya Nyaya Sanhita (BNS) kübok Arrla 93 (tanur sendokba) nung ajemdaker police-i tsürabur anema ken o ka benokogo.

Sub-Divisional Officer of Police (SDOP), Kalyani Barkade-i, "Onoki tongti ketdangsertem den külemi iba ken o asadangdar. Legal tsütsülen nungi metetpelaba sülen tsürabur anema Arrla 109-a (tepsettsü merangba) benoktsüa akok," ta metetdaksü.

National Crime Records Bureau (NCRB) data ajanga ashiba agi, India nung tsüraburtemi kinü tanur sendokba tatalokba teimba aliba state ji Madhya Pradesh lir.

Item ama tatalokbaji teimbaka kanga sensak tia mesüra maaksü nungi kümzüksü atema inyakba den sendaktepa lir.



October 02, 2025 nü Nagpur nung 'Rashtriya Swayamsevak Sangh Vijayadashami Utsav 2025' sentong nung RSS tongti, Mohan Bhagwat-i jembidang tangokba noksa nung angur.



TIR YIMYIM YIMOBILEM (EDITRIAL)

DIMAPUR FRIDAY, OCTOBER (MONGPUTENI) 03, 2025

Teintet rogotem dak imlar

Asen lima nung temelenshi nüngdakba indang o dang jembir masü saka kena mejema atener aser sangroa mejema azünger. Aji oda, asen lima nung yimten, lokti, arogo aser kibong ajak jungjunga raksar, teyanglushitsür mali, kati ka dak tai tongloksür aser kati ka dak imlar ta teraksabo ajak raksa saka teraksaba nung adenerbo shinga mali ta, lia lia amitsür süpeti teshisa aser sangremer halfpant tapok mateptet timtemba amato asenoka lenmang lendi tapoka mateptet kümdagi. Tangarbo nübortem asoshi terenlok mapatem inyakba nung endokba sen den meputepi terenlok mapatem mashimashi inyaka lira, idangjisa nübortemi ola adoker aser lanurtemi yimti ajak shibanga yur longkak aiter, anungji yimteni aji tsübua mapa shitak inyaker. Ajisüaka, asenokbo shingaa shinga tsübutsü mali, kechiyong ajak kasa dang, shibai teimba amuzükteter parji temoatsüba, anungji mapa meinyak ser sen agizüka achirtemang teimba aser mapa mashimashi inyaker sen agizüka achirtemang teimba ta, mapa meiyak ser sen achir o mashimashi inyaker sen achir na toktepba nungbo mashimashi inyaker nübortem meyong sen chitsürtemjiang tajungba ta bilema jembiba limaji asen lima lir. Iba lima nungji teintet rogotemang ochimashiba aser lanurtemang ochimashiba ta, kidang tebu o jabaso na toktepa seplep amai, asen lima yanglushitsü nüngdakbatem o agi jembir saka mapa agibo raksar ta tejembiba o mapa na mesütep timtemba mapangji tang asenoki ajangshidagi. Ibai Nagaland otsü kaket nung tapak tamajung ka asütsü. Iba ama teraksa mapa aser mapang ya yanglushitsü asoshi asen lima nungbo lanur aser kaketshirtem dak imlatsü mali, kechiyong parnoka tsürabur mesük jungjunga raksatetogo. Anungji, asenok taintemi asen chirnurtem aser parnok chirnurtem meimra, joko asenoka asenoksasa temulung meyiptsüla aser ochimashi aser memerükba mapatem nungi asenok pilatsüla, kechiyong tanü asen lima yanglushitsübaji teintet rogo purtem dak dang teimla lir. Aji oda, joko teintet rogotemi onokbo tambur tantsür aser pensioner ta peisasa takidak makaba nisung ama mekümi, shi temang, tanela aser tangatetba nung tashi itshir pei lima yanglushitsü asoshi apusotsüla. Tanü ya asenoki lanur putu ta bilemer dang ashi, mapa nungbo teintet rogo, tantsür tambur putu lir, kechiyong arishi küm tir US tir Donald Trump-i anir arishi küm 75 tain Narendra Modi aser Neiphiu Rio nungertem ajak ya lanurbo masü. Kasaji tang Nepal nung shimtetba ato kilonserla arishi küm 73 tain Sushila Karki-jia lanurbo masü. Aji oda, Trump, Modi aser Rio nungertemji asenok lir, anungji alima raksar süra asenoki raksar aser yangludi süra asenokiang yanglutettsü. Aji oda, asenok taintema ochimashi mapa inyaka kopiga alitsü ? Aser ochimashi len nungi bendenba rongsen kwi agibo tenük asüngtsü ? Itemji asen chirnurtemi nümadanga senmang küma mamangtettsü, kechiyong par medemertemi item rongsentemji sensatsütsü. Joko, asenok teintet rogotemi election nung vote alia election-i aitsü mebilemli aser election nung sen agi vote alia jajatsüa mebilemli. Kasaji, joko alima yanglushitsü asoshi asen dak nungi tenzüka asenok teintet rogotemi election nung vote me yokli. Iba amaji, office nunga aser asenok business inyakba tesemtem nunga, joko ojang amuzükdi, ojang adjust südi, kechiyong tanü asenoki mapa shitak meinyak ser adjust ser yutsüba nungji asüng asen chirnurtemi adjust mesütettsü. Aji oda, tanü asen lima yanglushitsüba mapa yabo teintet rogotemi tenzüksüla, kechiyong teraksartemiang tajungba yanglushitettsü.

OLEMSABANG

Ao Ojang Ana nung Oralok

~ T. Meren Paul, Lower PR Hill, Kohima

Arok Osep tasenba (Revised Edition) yakta adoktsü joko renema arudagi ta yaküm küm tu ora ka angazük, kanga yongyaseta ataa liogo aser takümbo adoktsü südi ta yimlaa ataer, ano merenemtet asü masüar tang tashibo tejangja osang kecha mangashir. Osep tasenbajia koba tashi tabensaba nung adoktetdir tang adoka aliba Arok Osep nung mamsemba ojang aikasa liaka idem rongnungi ojang ana “Mesem aser Mesen” dak sendakba oralok ojang karh bushitsüngdangba yangi lemsatepner, ano ni mepushitetba chikojunga alitsü, karh-i menuhshia bendendangtsüla. Asenok jembishinüba oshiooben ajak ya ostüla obola nunger anogoshia alu mapa aser aremtsüenlen arem yahta-a tasenba mapang mapa jagi jembishinüba, sensaksem, obentep, olangzük ajakji adokdaksü. Tanübo yimdaklira sünga teimba ka alu mayimer anungji inyaksangshi aser alu talen tasen makaba agi mapa indang tejembitsü makaji oren ah tejembitsü mali akumba agi oshi sama tendaktsür. Mesem ojang nung tejaklen aser tesülen bendenloka tetezü palala aketba ojang reprangdangra tejaklen bendenlokba (prefix) ojang aikabo mangur; tejaklen zülujang ana, “ki” enokra kimesem, “me” enokra – memesem, yamala karh dang lir, saka tesülen bendenlokba (suffix) ojang tetezü palala agütsüba ojang teyarika yamai angur. Ni tesüiba nung (former) science student asüji English literature aser linguistic kecha meteta mali anungji grammatic nung medangshir saka jempiba ojang tetzü lemsateper.

Arok Osep nung reprangdangra Mesem ojang item ana ya dang angur.

Mesem- tzü bendena ayu, tesem ka merüktet, kimung mesemtet, jenmung mesemtet, Mesemr- tezü nung atangba aonsotsü tapu ka, teküp aser tejang achir.

Ao Naga Dictionary Dr. E.W. Clark 1911 nung item ojang 6 ya enoka angur.

Mesem- menalokba, mulokba, menatepba

Mesem- tzübu mesem, arokboka merükteta yangluba

Mesemzük- azük tapu ka

Mesemdang- tzübu tzü mesemdang,

Mesemrer- tezü nung adangba aonsotsü tapu ka

Mesemtep- mesem, ajentep, atentep, menatep, meten

Er. Lanuakum-i adokba “Omolu” nung item ojang 21 enoka angur.

Mesem- meden, medenlok, ateplok, medentep, mesenlok, mesemshi

Mesem- mejangdaksü, amai yok, mesema yutsü, tanurji mesemjang

Mesem- Ki mesem, ki tasen ka mesem, tesem balaka mesem

Mesemshi- Tzübuh mesem, tzübu yanglushi, tulupah küma yanglushi

Mesembang- langka osed kati tanga osed ka sembangtsü

Mesemdang- langka osed mesentepdang, medenlok yanglushi, anong mesem

Mesemdang- majurutep, koda lir ta moodang, Kohimai arupah ki katiah mao.

Mesemden- tesem karh sema aotsüla

Mesemden- tzübuh aihka tasen yanglu, tzübuh mesemden

Mesemer- yahboker, ki tasen aihka mesemer litem

Mesemi- sema moo, ki mesemi melited

Mesemjang- amoa yokang, tanurji mesemjang

Mesemjem- tesem karhi sema aotsu, karh mesemdang

Mesemli- langka asemtsü aliba masemtsü

Mesemlok- tesem talila karh sema mao

Mesemmah- ki sema aopa ano karh anünga lir

Mesemmih- langka kanga junga asem

Mesemnü- dola mesemnü, meinyaknüba tat- kisemi monü, mesemnü

Mesemok- dola tasen alitsü nong masem

Mesempa- nhisong karhi tamajung inyaksü menongnang

Mesempah- pongdang ka nong langka asempah mesembok

Idem Osep asem nung küta maliba ano idem Ojang 18 yaa jembir

Mesemdangdang- tzübu, kimong mesemtsü mapa tenzüdangba inyakdangba

Mesemlok- tesem tuluba kuma yanglushi

Memesemlok- tesem tuluba kuma meyanglushi

Mesempet- mapa merenemteti doktsü, teinyakpet, tat- tzübu mesempet tzü mait

Mesempet- tulur nem sempet magütsütet

Mesemra- anükanüka masem, luon nung mersü mesemra

Mesemrep- kecha anünga medoktsüi ajak amanglemba

Mesempok- maka asüba mezüng tasen mesempoka yangluba

Mesempok- tzüshi ahla mesempok, tzü senzüka aotsü tapok mesempok

Mesemsem- mopung tanep aonba mali

Mesemdaksü- Tola, süoshi, korang, yangko, tsüngsem mesemdaksü

Mesemdangtet- tangar semdangi moutetba, talisa shiranger mesemdangtetba

Mesemshi- mezüng doktsür aoba ano tanaben arua mesemdang, moudang

Mesemshi- süoshi rezünga ayuba shingai aketeta mesemshi

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Changtongya Town Baptist Arogo nung tetsürtem anema alitsü tasa angazük



October 02, 2025 nü Changtongya Town Baptist Arogo nung 'tetsürtem pela-ang' sentong nung shisalen sayurtem den shilem agia adenertem külemi tangokba noksa nung angur.

Mokokchung, Mongputeni/October 02 (TYO): Changtongya Town Baptist Arogo (CTBA) nung "pela-ang tetsürtem" ta sür tetsürtem temeja sentong ka "Anema alitsü tasa" omen dak rangloker CTBA Tenla kidang ayongzüka kaogo.

Iba sentong nung tetsür 150 shi adenshia shilem agia aden.

Iba sentong nung shisalen sayur IMDH (ART) nung Senior Medical Officer, Dr. Temsumenla Longkumer-i tetsür ka mashisa alidang temang koda anepalutsü, tanur junga asotsü asoshi kechisa inyaksüla, kibong asamayang yayim, asen libaliru mekümdangba ajanga menaba tashitak kar, tetsürtem dak tashitak bulua adokba den itemji koda anepalutsü mesüra paitoktsü tasa kar lemsatep.

Tanabuba shisalen sayur PHC Mangmetong, Medical Officer, Dr. Amongla-i mama tashitak (breast cancer), temang nung azü tajung ajema akümba (anemia) tashitak, tebenbang (gastric) ashiba, aser

anema alitsü asoshi tetsür kadi pei mang koda meima anepalutsü aser merüka ayutsüla, item indang tasa aser teinyaktsütem kar lemsatep. Ano shisalen sayurtemisa anema alitsü asoshi temang arakzüba (exercise) tasa kar ia sayu.

Iba sentong tenzüka Changtongya Town Baptist Arogo Pastor, Rev. Temshi-i mapang tatsüka agidang, tepelaji aika dang lir aser lenmang balala nungi tepelaji angutsü akok, saka tematibaji Tsüngrem meteta Khrista akaba nungi adokba tepelaji tashi tulutiba lir, ta Yisu-i tepela indang jembiba nungi medemdanga ashi.

Paisa Khrista akaba nungi tepela adokba tatishitsü tetsür kar bener arudang, Missionary Staines shiba India lima mi agi ronger südaksü pa kinungtsü Mrs. Clays Staines aser tawa tepsetsang Charlie Kirk kinungtsü Mrs. Erika Kirk, tsükchirtemi parnok taküm agiaka Yisu tenüng nung tatok agütsü. Laishiba nunga Hannah ya Tsüngrem metetba tetsür ka

liasü. Tsüngrem angatetba aser Khrista akaba nungi adokba tepelaji balaka. Alimai atishitsüsa parnok dak tepela liasü, ta metetdaksü.

Iba sentong ya taküm agi joko küm 14 shi agia arur aser ibai kümshi agiba sentong ka. Kümshi omen balala shima agir aser taküm "anema aliba" tsütsü rangloker agir. Iba ya ozü arogo nung tetsürtem asoshi mejeta agiba sentong ka aser iba ajanga tetsürtem lenmang aisü nung temoatsü ngua arur, anungji, tarutsü nunga ibai maneni ayongtsü tebilemba lir, ta Assoc. Pastor (W), Rev. Narola Imchen-i iba osangbener den jembidang metetdaksü.

Aonung tetsürtem temeja sempetlep salaba sentong ka agi aser iba sentong nung kari Tsüngrem nüngsang ken atenba den kari Aotsür sobusolemtsü indang rateta ashi, aser telok balalai pei sempet sala-a shilem balala agiba ajanga tesentepertem kanga pelatep. Rev. Narola Imchen-i Tsüngrem O aben.

Chhattisgarh nung yimdaklirtemi Khristan kibong ka meindok

October 02, 2025: September 28 (Amongnü) Chhattisgarh nung Sukma district kübok Mukaram yimdak yimdaklirtemi Khristan kibong ka meyong kiojen bendoktsü.

Mukaram yimdak Sodi Deva'er kija Khristan tamangertem lir. Par kibongi arishi piyong anarongdena asüba ki ghonda ka tsüngda bendoktsüogo.

Amongnü anepdang Sarpanch Madvi Kosa aser Patel Bojja na leniba nung lokti kati 9:00-10:00 ako nung Deva'er ki bendoktsü.

Osangbener den jembidang Sukma District nungi Santosh Markam-i, "Mukaram nung yimdaklirtemi Sodi Deva'er kibong dang Khristan yimsü tokjang ta rongshia liasü. Küm pongu tejaklen Deva-i Khristan yimsü agizüka liasü. Par kibongi Khristan yimsü toktsütsü memelungba agi par ki bendoktsü aser yimdak nungi meindokogo," ta metetdaksü.

Deva'er ki bendoktsüba dang masü saka par lu-a raksatsü. Lokti jagi Deva kinungtsü Gangi (32) dak teka sangshi aser yimjak nung maaksütsü.

Iba tatalokba sülen Deva aser pa kinungtsü na den par tanur ana (tainlonglong) yimdak nungi jena oa kilometer 15 pilar aliba yim ka nung jenok.

Sukma District nungi Santosh Markam-i Arogotem, Khristan organisations aser temelungertem dang peii akokba lenmang balala ajanga Deva'er kibong dang temeim sayuang, ta mepishia metetdaksü.

Evangelical Fellowship of India indang Religious Liberty Commission-i ashiba agi, yimdaklirtemi iba yimdak Khristantem memelaba agi Deva'er kibongi kilometer 2 pilar aliba Sehtalnar-i oa tekülem sentong nung dena liasü. Iba Arogo nung pastor ji Betus lir.

Tang Deva'er kibongji Naiyapara nung Pastor Israel'er kidang jenoka lir.

September 26 nüa Chhattisgarh kübok Chintalnar nung lokti tulu kati Tenla kidang Khristantem lumia sarasademba mapang timtem agüja liasü. Lokti jagi Tenla kidang Laishiba densema osetsüset aika raksaja liasü.

Chhattisgarh Christian Forum Tir, Arun Pannalal-i sangdong ka ajanga, Chintalnar nung aliba Tenla kiji küm 30 tejaklen asüba lir aser Arogoi kodanga timtem majangshii aru, ajisüaka tangbo mamangertemi iba tesem nung Khristantem anema nokdaker, ta metetdaksü.

Pannalal-i, "Tang mapang ya tejashitsü mapang ka lir, kechiyong tangbo onoki sarasadem-a magitetsüsa kümogo. Iba li (Tenla ki kimong) ya onok meyong aser onoki yangi tesüba küm 30 tashi sarasadema aruogo. Ajisüaka tanübo onoki sarasadem-a magitetsüsa kümogo," ta metetdaksü.

ANOGO ABEN TSÜNGREM DEN

Ibai kü meimchir pa dang angang! - Mathi 17:5

Peter aser tangar nütsüngtem teti Tsüngremi mulungba mangatetti liasü. Yisui balaka bilem, nütsüngtemi balaka nung temulung agütsü ama lir. Pa anasa aliba nütsüng asem tajungba yaritettsü asoshi Pai pa kangki nung bendanga agütsüba nung rangloker Yisui parnok asem sentsü melenba Tenemi anir atu. Idakji Yisu sentsü melen aser Mosa aser Elijah, otsü nung tashi taitiba Tsüngrem nisung ana aden. Aji saka nütsüngtem anünüa liasü! Yisu den sarasadema alitsü melen mejanga alitsüang jangraa liasü.

Kodang nütsüngtem saaka tanabena parnok tangalen atsüzük. Iba mapang Peteri pa sentong semtu asem yanglutsü ashi. Nütsüngtemi Tsüngremi Yisu Khrista ajanga tekümtet mapa dang nungi parnok Tsüngrem asoshi inyaksü bilemba nung tali temulung agütsü. Tatem nung Tsüngremi parnok nükla ajak indoktsü aser Yisu dang ngudaktsü. "Ibai Kü meimba chir, shiba dak ni temulung achir. Pa dang angang."

Tanela nung melamelaa atsüa aotsü temela. Nai ajak toktsür Yisu aser temeket nung Pai inyakba nung rangloker asü ? Tsüngrem mulungjang nung kechi lir, aji nai jangjaa mangashi mapa nung adentsü nai jangrar asü ? Na kechi agi atsür odaktsür aji indokdaksütsü Tebu nüngdaker asü ? Nai Yisu dak rangloker asü ?

Asenok tamakok ochishia nangzüksüba dang nungi tangar tanela nung takok ngua aliba shi nemtsütsü temelaba. Yisui "parnok tesongtem" ta ashi. Pa nütsüngtem süngmanger alitsü (Mk. 9:39). Pai parnok dang ashi "Shiba asenok anema masü pa asenok tsütsü lir." Nai taküm aliba lesson angazüker asü? Nai tangar tanela nung takok anguba nung pelar asü ? Shirnoki Kibuba tanga lemang ka nung tenzüker mesüra tanga telok ka nung adener parnok ajungshir asü ?

Süngkomen B/Arogo nung Teintet Rogo asoshi Free Medical Camp ka agi



Mongputeni 1, 2025 anogo nung Süngkomen Baptist Arogo nung Teintet rogotem atema "Free Medical Camp" ka ayongzüka akaba sülen Impur Christian Hospital (ICH) nungi Palliative Care team züngsemtem aser Süngkomen Baptist Arogo nung Asst. Pastor Matsüng Lkr-i anir tenzükertem tangokba noksa nung angur.

Mokokchung, Mongputeni/October 02 (TYO): Tanü tashi tait lokti ka litettsü asoshi temang anema aliba ya tongtibang shilem ka kümogo, ajisüaka kuli balala ajanga talisa teintet rogotem aikati nüngdakba mozü tajung magiteti timtema lir.

Anungji parnok asoshi nüngdakba mozü agütsütettsü nükla nung aser Teintet Rogo Amongnü (Senior Citizen's Sunday) nüngtem nung parnok nem akhüm agüja Mongputeni 1, 2025 anogo Süngkomen Baptist Arogo ajanga "Free Medical Camp" ka ayongzüka katsüogo, ta Süngkomen Baptist Arogo nung Asst. Pastor, Matsüng Lkr-i sangdong ka ajanga metetdaksü.

Iba Camp nung Impur

Christian Hospital (ICH) nungi Palliative Care team ka, Dr. Aka Longchar, Medical Superintendent ICH-i anir Mrs. Narola Walling Chaplain, ICH-i achaayanga arua kanga takok nung agiogo. Ajak agi teintet rogo 92 arua temang tendangba den külemi mozü tajung angati agütsüogo.

Süngkomen Baptist Arogoi maneni nübor telok balala den yamala mapa tajung inyaka aodang Tsüngremer teyari aser temoatsü agütsütsü tamang ayur.

Süngkomen Baptist Arogo ajanga ICH Palliative Team dang sentong takok ngutettsüsa nübo aser sempet ajak agi yaritepba asoshi pelaba lemsateper, ta kasa sangdong ajanga metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Tilatem

(n) tila aika (small ones)

* An tetsüi techanu tilatem mesür.

Tilatiri

(adj) tilalatem, mechimenu (tiny things)

Dokan nung tilatiri alidang memeteti sen aika endoker.

OLONG PAITEP # 7288

	1		2			3		4		5
6								7		
					8		9			
			10							
11										
				12						
13		14		15						16
17										18

TIPLIN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzüik
10. Tasola
11. S _____
13. Yagi ajak ashioxtür
15. Ki aokba oset
17. Ak shi nung inokba tasen
18. Ishika

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ___ hi
16. Akümüli nungi pilar

OLONG PAITEP # 7287 TELANGZÜBA**TIPLIN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden,
3. Kioktsü, 5. Lenti, 7. Tajangzüik,
11. teronem, 12. Sempa,
13. Jahaz.

NAI-A YA METETTER

Nisung anati anir nisung 80-i küm asem tsüingda GOLDEN ORB SPIDER million 1.2 bendena sorak tem nungi silk agizüker alima nung rarest textile: GOLDEN SOLK CAPE yangluogo.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :



October 2025 anogo nung Dimapur, Chümoukedima, Niuland Akhoya Fellowship aser District Mental Health Program, District Hospital Dimapur na longjemer ayongzüikba Senior Citizens Health Camp sentong nung adenertem noksa nung angur. Iba sentong nung Dr. A. Tamsüyanger Ao (Psychiatrist) - i tongtibang shilem agia temang, tanela aser tokolok anema alitsü indang len sayua liasü. Iba sentong ya Set Free Church, Sovima nung agia liasü.

Kuki-Zo nungertemi Oct 3 ya Separation Day ama amungtsü**Imphal, Mongputeni/ October 2 (Agencies):**

Committee on Tribal Unity (CoTU) of Sadar Hills-i sangdong ka ajanga October 3 ya 'Separation Day' ama amungtsü ta metetdaksüogo.

CoYU-isa anepdang 6 nung nikongtsütsü 6 tashi ghonda 12 National Highway-2 (NH-2) shibanga ayutsü ta metetdaksüogo. Iba lenmang ya Manipur atema kanga tongtibang lenmang ka lir.

Maneni CoTU-i kasa sangdong ajanga ashiba agi, Manipur nung kin o kin tsüingda mangatetep ya 2023 küm May 3 nü tenzüik aser küm asem sülena tang tashi mebeneteti lir.

State nung kin o kin tsüingda mangatetep ya tamajungba küma yokba atema iba lokti tentet yagi N Biren Singh aser MP Sanajaoba na lenisüba kübok taoba BJP sorkar dak tai tongloksüogo.

State nung azütokshi lendong tenzüikba sülen CoTU-i ita shia tasemnübuba ya tasütait lisopurtem aser asürtem shirnoki ali atsünga aruba non-tribal loktitem nungi Kuki-Zo nung ali kümzüka ayutsü atema pei taküm bendanga agütsüogo parnok bilemteta aser tushia amunger.

"October 3 nü ya Kuki-Zo nungertem ya Meitei nungertem nungi shitemang aser arrtsü

ajak pilatokogo ta India sorkar nem metetdaksütsü asoshi 'Separation Day' ama amungtsü," ta kasa sangdong ajanga metetdaksü.

Iba anogo amungba nungdem nung NH-2 lenmang nung aliba dokantem, rijutem aser shishilembadak ajak shibangtsü. Ajisüaka medical dak sendakba nung inyakyimtem aser asüpila sentongtem menokdangtsü.

CoTU-isa, küm ishika mepetmesü nung aruba mapang Kuki-Zo nungertem dang temeim sayuba aser yariba atema kanga pelaba lemsatepba den maneni longjemer inyakyonga aotsü ayongzüikogo.

Zubeen asüba bushisüngdangtsü Assam police team ka Singapore-i yoktsü**Guwahati, Mongputeni/ October 2 (Agencies):**

Kentener Zubeen Garg asüba bushisüngdanga aliba nung shilem ka ama Assam police-i Mutual Legal Assistance Treaty (MLAT) kübok provision tem dak ajemdaker Singapore-i team ka yoktsü, ta Special DGP (CID) Munna Prasad Gupta-i October 1 nü metetdaksüogo.

"Ken o kanga junga bushisüngdangtsü atema Singapore sorkar den longjemer temzüing ozüing kübok tinyaktsü maparen ajak inyakdar," ta Gupta-i ashi. Assam nung ken o bushisüngdang den külem ken o dak sendaka alirtema bushisüngdanga arudar.

Aija alir Shyamkanu Mahanta aser Siddharth Sharma na indang mobile phone puogo aser Zubeen Garg indang phone-a CID ket nung lir, koba osang ajanga ashiba agi

Siddharth Sharma ket nung liasü.

Social media balala nung prokshiba noksa ajanga Shyamkanu Mahanta apuba sülen pa indang mobile phone meyipa agiba sayuba ya shitak masü ta Gupta-i shiogo. "Nisung ka apuba sülen parnok phone parnok ket nung ayutsüji tamakoktsü. Iba osang ya tai," ta Gupta-i ashi.

Chief Minister Himanta Biswa Sarma-i taoba mapang ashiba agi, Special Investigation Team (SIT) züingsem anati bushisüngdang nung shilem ka ama Singapore semdangtsü. Paisa, nüburtem dang sorkar inyakyim nung tamang akatsü mepeshia liasü.

Shyamkanu Mahanta aser Siddharth Sharma na kentener Zubeen Garg asüba ken o nung aija lir aser Special Investigation Team (SIT) ket

nung anogo 14 ayutsü tetuyuba agütsüogo, ta ketdangsürtemi Bodhbarnü metetdaksü.

Parnok taoba mapang Alpana Apartment, Geetanagar, Guwahati nung Chief Judicial Magistrate (CJM) kidangi anirogo. Ken o angadanga sülen CJM-i parnok ya SIT ket nung yua ken o ashishitsü aser bushisüngdangtsü atema tetuyuba agütsüogo.

Mahanat ya Delhi adena Singapore nungi anir aru aser Sarma (Zubeen manager) apuba sülen ken o kanga jung asadanga arudar. Kentener asüba dak sendakba nung tia tensa ya kanga junga asadangtsü nüngdaka lir.

Parnok anishiba mapang CJM'er ki aser Lokpriya Gopinath Bordoloi International Airport nung security akangshia liasü.

Mizoram nung temesepba mozü shibelener 5000 dak tema apu**Aizawl, Mongputeni/ October 2 (Agencies):**

Mizoram nung January nungi September tashi nung temesepba mozü shibelener 5,525 puogo, ta state Excise and Narcotics department-i metetdaksüogo.

Department-i heroin seret 41.432, methamphetamine tablets 229.890, crystal meth seret 48, ganja (cannabis) seret 198.853 aser opium seret 1.193 densema temesepba mozü balala puogo, ta kasa sangdong ajanga metetdaksüogo.

Parnokisa Indian-made foreign liquor litre 12,805, asaba yi liter 52,822 aser beer litre 12,309 puogo.

Kasa mapang nung yi aser temesepba mozü shibelener nung amshiba gari 109 puogo, ta department-isa metetdaksü.

Excise department ketdangsürtemisa Mongolbarnü Champhai nung heroin gram 118,330 bener lia arishi küm 47 tain nisung ka puogo.

Young Mizo Association (YMA)-i teyari agüja Excise department aser state police nati September 1 nungi tenzüika "operation Jericho" kübok ita pezü temesepba mozü shibelenerntem aputsü atema inyakdar.

September ita Champhai district nung police aser Excise and Narcotics department-i

temesepba mozü aika puogo. Iba tesem ya Myanmar den arrtsü nung lir.

Champhai district police kija-i September ita heroin seret 3.282, methamphetamine seret 3.282 aser tanga temesepba mozü sen crore 11.66 alang puogo, ta police-i ashi.

Ajak senteper ken o 19 benokogo aser Narcotic Drugs & Psychotropic Substances (ND&PS) Act of 1985 kübok nisung 25 puogo.

Champhai nung Excise and Narcotics department-i kasa mapang nung heroin seret 2.772, methamphetamine seret 42 aser tanga temesepba mozütem puogo.

Gaza City nung alir ajunga tepsettsü Israel-i amokmeren

Jerusalem, Mongputeni/ Oct. 02 (Agencies): Bodhbarnü Gaza tesem balala nung Israel-i amakdang Palestine nunger nisung 20 tepsetogo aser Gaza City nung tang anünga aliba nisung meyirijang aika dang iba yimtsü yutsür ainshitsü totuyuba agütsür aser jena aotsü asoshi ibai maongka tatembangba lir, mesüra Israel tashi ajak amshitsü ta ashi.

Bodhbarnü Israel Defence Minister Israel Katz-ia social media X nung, iba yimti nungi shiba mainshi lidir parnokji kiralongrar aser kiralongrar

yarirtem ta züingshitsü ta ashi.

Tanen makai bomb pokloksüba ajanga Gaza City ajasatsüogo aser anogoshi nisung aika tepseter, nisungaliba ki aser school ki zünger mezüngmai raksatsür, Palestine nunger meyirijang aika south len mejangjaba tia alileni jena aor aser aiben parnok dak amaker.

Israel mitkar temi nüburtem dang ainshitsü totuyuba agütsür aser south tsütsü tzükum anasa lenmang nung military choppers, drones aser tanks amshia parnok arishir, ta osangbener kati al-Rashid lenmang nungi ashi.

"Israel mitkar temi merenshiba aser tetsübo nung nisung aika Gaza City yutsür maor," ta osangbeneri ashi.

Brehostibarnü Gaza City anüolen Ansar area nung Israel drone kati tanur ka khaset, ta emergency aser ambulance services ajanga ashir.

Gaza Strip tiyonglen pei ki yutsür tesem balala nung alirtem dak Israel-i tenük yoker amakba nung nisung toku asü aser 13 yiru, ta medical osang ajanga ashi.

Gaza tiyonglen al-Bureij refugee camp nung Israel indang drone agi ki ka

amakdang Palestine nunger ka aser pa kinungtsü tepset.

Ano Deir el-Balah nung Israel-i drone amshia amakba nung Palestine nunger ka tepset aser ter dak tema yiru. Gaza Strip south len Khan Younis yimti anüolen al-Mawasi area nung Al-Aqsa University campus telung nung tesem balala nungi jenoka aliba süki ka nung Israel indang drone nungi bomb poklokja nisung ti yiru, koba "safe zone" ta sangdongaka Israel-i tanen makai amaker.

Civilian tem south leni jena odaktsütsü nükjidong nung Israel-i Gaza City nung tanen makai bomb poklokjaka nisung karbo lendong aketba north leni meyipa aor. Palestine nunger meyirijang aika Israel-i bomb pokloksüba ajanga north len nungi south leni jena oa liasü.

inyakyim khen atema shibanga atar ta Bodhbarnü sangdongogo, aser kasaji NGO Doctors Without Borders-ia taoba hopta sangdonga lir.

"Deir el-Balah aser Rafah nung aliba onok indang office nungi tensa agi melaba mapang ICRC ajanga Gaza City nung civilian tem maneni yaritsü merangtsü," ta sangdong ajanga ashi.

Kasa mapang Israel-i kin ajunga samatsütsü meranga raraba tembangtsü asoshi United States-i ceasefire plan ka benokba nung Hamas maneni jembishinü akar.

Ajisüaka Gaza nung Hamas indang military wing tekolakbai iba ceasefire sentong tasenba agizüktsü memulunger ama ajiteter.

US sorkar kongsang kar maneni shibanger

Washington, Mongputeni/ Oct. 02 (Agencies): United States ozüing yanglurtemi federal sorkar shilem kar shibangba tatem kati arutsü asoshi inyakba nung terenlok malir, kechiaser Republicans aser Democrats temi anogo ananü buba senotsü indoktsü bill khen asoshi benokba nokdangteper.

Bodhbarnü US Senate nung mangatettep aliba bill benokba tem tera agi nokdanga liasü, aser Mongulbarnüa kasaji ataloka 'shutdown' mepaidoktet.

Republican teloki November 21 tashi sorkari senotsü agütsüba atsülangtsü benokba Senators temi 55-45 vote agi magizük.

Democrats ana, John Fetterman (Pennsylvania) aser Catherine Cortez Masto (Nevada) aser independent nungi Angus King (Maine) nungeri Mongulbarnü ama iba bill bhukuma vote agütsü.

Democrats indang bill, koba ajanga healthcare tasen nung sorkari sen \$1.5 trillion shi agütsütsü lir, iba ya bhukuma votes 53 aser anema votes 47 agütsü, kong Republican telok nungi ozüing yanglur ajungai anema nokdaka liasü.

Sorkar kongsang kar shibangba mechi Democrats dak kongshitsü ta US Tir Donald Trump-i nangzüka lir, koba ajanga sorkar indang services kar anena lir aser tongtipang mapa inyaktertem khen lir taa agütsütsü nangzüka tang atema taa magütsüi mapa inyakdaktsür.

White House budget director Russell T Vought-i ashiba agi, administration ajanga Democratic telok kübok aliba state asoshi infrastructure yanglutsü atema lemozükja aliba sen \$26bn soita ayutsü.

New York City nung transport projects atema lemozükja aliba sen \$18bn soiter, California, Washington aser Hawaii densema states 16 atema "Green New Scam funding" asoshi sen \$8bn lemozükja aliba songdemogo, ta Vought-i ashi.

US tiri taoba mapang 'mass layoffs' mapa kuma inyaktsü asoshi iba shutdown ya amshitsü ta amokmerena aliba ama inyaktsü, ta Trump administration ketdangsür temi ashir.

"Onoki nisung kar mapa nungi anentsütsü. Tesem kar nung tongtipang services meshibangtsü atema onoki sen kumzüka ayutsüla," ta US Vice President JD Vance-i ashi.

Iba shutdown ya ananü bubai ayaoka aitogo, saka Republicans mesüra Democrats katia atsü-anem akatsü bilema aliba majiteter.

Trump-i America nunger ya "pawns" ama amshir, ta Senate Minority Leader Chuck

Schumer-i aitsü.


Trump indang One Big Beautiful Bill Act nung aliba healthcare subsidies atsülangtsü aser Medicaid cuts melentsü Democrats temi merangba ajanga nübur taginüba sayur, ta pai ashi.

"Talia masü. Ajema masü. Parnoki iba khuret tulu parnok tapubang nungi agizüktsü asoshi onok dang mener jembishinü lidaktsüner," ta Schumer-i ashi.

Republican Senate Majority Leader John Thune-i Democrats tenüing asener.

"Parnoki Tir Trump sempaba ajanga tajung kecha mebilemer. Democrats tem nüchi dangi arua sorkar tanaben lapoktsü imlar," ta Thune-i X nung ashi.

MOLUNGNEN O



Late: BENDANG AO

Aso: 03-09-1946 - Asü: 27-09-2025

Temeim Tsürapur **BENDANG AO** Kodaker tajaba ola angashia ali wadangtem renemer, ani süngzükdaki aoba anogo 27-09-2025. Ozü mulongjang amang mepet tulu agi süpang medem shirepa aliba tia tako mapang aria bilemer jentisa-jenti mezülüjem ma kija-kipong temeim ozü tepela nenok den tsüngdong mayimjem sasaseta iba ocet ajanga nenok ajak den tepela tulu lemsateper.

Ano item lokti den ozü molungnen tepelaba tulu zülusemer.

- NSCN/GPRN.
- NSCN/GPRN Ao region.
- NSCN/GPRN Hevuto Battalion.
- Longpayimsen Village Council.
- Longpa Village Council.
- Dimapur Longpa Senso Telongjem.
- Bank Colony Council/youth/nüpurtem.
- Tzürangkong Senso Telongjem.
- Tzürangkong Tzükong Yimtsung balala Village Council.
- Tzürangkong Coal mining Union.
- Tongpok Semchir Imsongunger Kidong Telongjem.

Masadangtet tepela tang aser teti ozü molung nung nenok ajak den alitsü. Tulusang Tsüngremi nenok ajak moajangma.

Temeim Kinungtsü, Jala-Jabaso, Semchirtem aser Anük-apang

MONGSENYIMTI COMPOUND BAPTIST CHURCH

In Aid of Staff Quarter

Draw date: 2nd October 2025

Result :

1st Prize -- Sl. No. 2475

2nd Prize -- Sl. No. 2300

3rd Prize -- Sl. No. 1297

Consolation :

1480, 438, 2185, 1164, 2086, 1625, 1670, 1438, 1773, 283

Lottery nung adoker ajaki anogo 15 tsüngda arua agizüktsü metetdaktsür.

Sdl-
Convenor

PELABA LEMSATEPER



Wt. Meyimongla Jamitsür (Chuchuyimlang)

Aug. 07, 1942 - Sept. 25, 2025

Ozü temeim tsürabur asüku nung shirnokisa aria bilema sarasadem, nübo aser rongsen agi ozü dak malangba temeim mapatem agi onok yariogo, nenok ajak dang onoki kanga pelaba mulungnen o yangi lemsateper.

Onok tsüngdong aruagi nenok nisung shia dang pelaba meshitetba atema sasar, ajisüaka Tsüngremi nenok temeim mapa tajung asoshi moajangma ta onoki sarasademtsür.

- Temeim Chirnur, Anükapang aser Semchirsemnurtem.

MOLUNGNEN O



Onoki teti meimba arishir tsürabur aser nokinketer obala **Wb.Sosangtemba** (Longsa), WWII veteran, khenpika shiranger arishi küm 108 tashi lir, September 28th, 2025 nü iba akümüli wadang toktsür tipu limai tasendang, ozü mangyim jashi nung shirnokisa sarasadem den nübu, rongsen aser mulung süngzüc o balala agi asüku lemsatepogo, nenok ajak dangi tsüngdong arua tepela o meshitet nung, iba sabang ajanga ajak dang pelaba lemsateper. Nenok mapa tajung asoshi takar Tsüngremi talubosa lepa moatsütsü onok tamang sarasadem.

Chirnur, semchisemnur & kinungertem.

ABAD-i sponsor süa Disabled tem atema 7buba State Games asayaogo



Dimapur, Mongputeni/October 2 (TYO): Disabled tem atema 7buba State Games, Aoyimti Baptist Arogo, Dimapur, aser Special Olympics Nagaland (SON) na longjemer September 30 nü Aoyimti Futsal Court, Dimapur nung asayaogo. Puti otsü nung tang mezügbuba iba asayamung ya Arogo kati ajunga sponsor süa asayaogo.

Asayamung nung tetoktepba tem Renjamo Y. Ngullie-i (SON President, Dimapur District) achaayang aser Master Trainers Achum Ovung, Jangtsumen Tzudir aser Imlitwati Lemtur nungeri

anir SON coach 18 aser tenük tapok aser tenarong tajak asayar tem densema asayar 93, asemtepba, relay, Jump aser shot-put, bocce aser football asaya asayaogo. Asayatem ajak Special Olympics Divisioning temzüng özüng kübok asaya liasü.

NAPAD (Nagaland Parents Association for Disabled)-i Kohima team senzusenpong sponsor asü. Kohima ya Mrs. Bendangla Kikon (SON President, Kohima district)-i ani, Dimapur Deputy Commissioner-i coach tem indang jersey aser tanga tilateri tintokbatem atema teyari

agütsü aser Keystone Education Society-i Aadhaar maliba asayartem asayba tesem nung Aadhaar yangluja liasü. Aoyimti Baptist Arogo nungi lanur volunteer tem assistant coach tem ama inyak aser iba ajanga asayamung mera taketba kümdakja liasü.

SON Chief Coach Among aser Aoyimti Baptist Arogo Dimapur nati bendanga agüja inyakba ajanga asayamung kanga pelatepa jangradema mungogo.

Amongla-isa, Nagaland nungi special athletes temi national aser internationaj jenjang nung medal 140 dak tema nguogo

ta ashiba den state sorkari parnok takotem jangjatsü aser temsüa aliba asayartem nem senpet agütsütsü nüngdakba lemsatepa liasü.

SON Area Director, Arenlai wara poktetba sülen National Office (SOB, Delhi)-i National asayamungtem atema senzusenpongba asoshi senotsü aser District o State Games atema-a teyari magütsür, aser iba ajanga asayar aser coach tem national jenjang nung shilem magiteti arudar, ta ashi. Tetsükdaktsü aika liaka SON coach tem aser züngsemtemi maneni taah kecha magi-i special athlete tem tetenzük nungi tanü tashi tenzüka arudar, ta laisa shisem.

SON-isa, Aoyimti Baptist Arogo Dimapur-i 2024 küm October 12 nü SON athlete

aser coach tem asaya anogo ka sponsor asüba menungra bilemteter aser iba ajanga asaya ajanga shinga mebendangi benshiba tali tashi taitba kümdaktsür, ta ashi.

Taküm iba asayamung nung nisung 170 shi-i shilem agi. Asayamung ya chiyongtepba sülen tembanga liasü. SON-isa, asayamung nung shilem agiba School, NGO, volunteer tem, Dimapur DC aser NAPAD aser Aoyimti Baptist Arogo, Dimapur dang kanga pelaba lemsatepogo.

SON-i, tarutsü nung Arogo, lokti tentet aser lokti balalai iba tatishitsü tajung sülen anidaka special athletes nem tashi agütsütsü, aser parnok lokti nung meraketa aser nema danga litettsü asoshi agizüktettsü imlaba lemsatep.

1buba Public Health Engineering Department Sports Meet tenzüko

Dimapur, Mongputeni/October 2 (TYO): Minister for PHED and Cooperation, Jacob Zhimomi-i Brehostibarnü 1buba Public Health Engineering Department Sports Meet 2025 tenzüksüogo. Iba asayamung ya Arena 365 Kacharigaon, Dimapur nung asayadar.

Sentong nung o jembiba

mapang Jacob-i, department-i ayonzükba ama arua asaya-a sportsmanship sayuba atema asayartem nem tenüngsang agütsü. Paisa, iba inyakyim ya state nung tanga department temia angazüka inyaksü imlaba lemsatep.

Pai iba amala inyakyim ajanga, saisapong ya profession tajung ka ama

ajungkettsütsü ta ashi. "Iba sector nung profession security, job security lir, aser na asayar tajung ka süra ajaki meteta akümtsü aser rongsenketzüng nunga takar akümtsü," ta pai ashi.

Ajak senteper district balala nungi team 70-i futsal, badminton, carom aser arr atsütepba nung shilem agidar.

Tennis Hall of Fame 2026 atema Federer nominate süogo

Mongputeni/October 2, 2025 (Agencies): International Tennis Hall of Fame 2026 class atema nominee tem rongnung Roger Federer temaba jenjang nung lir. Federer ya Grand Slam kija asaya 20 akokba mezügbuba asayar lir.

Federer asaya aliba mapang pai asayamung 103 akok aser kija asaya 1,251 kokogo, koba Open era nung asaya timtiba akokba asayartem rongnung Jimmy Connors sülen tanabuba asütsü. Pa season pongu ATP No. 1 jenjang nung tembang aser pa temaba jenjang nung hopta 237 liasü. Pai anir Switzerland team-i 2014 küm Davis Cup akok, aser 2008 Beijing Olympics kija asaya nung gold medal aser Stan Wawrinka den senteper tarep asaya nunga gold medal ngua liasü.

2005 nungi 2007 tsüngda Federer Grand Slam final 10 atong aser ti koka liasü. 2010 küm tashi nung pai asayamung tongtibang 18 nungi 19 final atong aser quarterfinal 36 aser

semifinal 23 atonga tongteta liasü. Federer ya tennis asaya ambassador ka lir aser pai English, French, aser Swiss German oshi agi tongteprateper. Pa tatembangbuba asaya 2021 küm Wimbledon nung asayar aser taruba küm Laver Cup nung Nadal den külemi asayaba sülen asaya nungi anisüngzüka liasü.

Federer den Grand slam ana koker alisang Svetlana Kuznetsova aser 2009 U.S. Open akoksang Juan Martin del Potro nata nominate süogo. Contributor category nung Tv announcer Mary Carillo aser administrator Marshall Happer na densema lir. Inductee tem ya November ita sangdongtsü.

Federer ya Grand Slam pezüprongla akokba tebur kija asayar ti rongnung ka lir. Pai Wimbledon ti, Australian Open trok, US Open pongu aser French Open ka kokogo. Pa mezügbuba Grand Slam 2003 küm Wimbledon nung akok aser 2009 küm Wimbledon final nung

Andy Roddick koka Pete Sampras indang record ajateta liasü. Federer-i Grand slam 20 akokba ya Nadal-i (22) ajatet aser iba sülen Djokovic-i (24) ajateta liasü.

Federer-i US Open ya ponguben atonga koker liasü saka trokbuba akoktsü merangba mapang 2009 küm pai final nung del Potro makok.

Kasa mapang nung Del Potro world No 3 tonga asayaogo, pai 2016 Rio Olympics nung silver medal angu aser kasa küm Argentina-i team-i Davis Cup akokba nung teyari agüja liasü. Pa tatemsa 2019 küm French Open nung asayaogo.

Kuznetsova-i 2004 küm US Open aser 2009 küm French Open kokogo aser 2005 aser 2012 küm Australia Open nung tarep asaya anaben kokogo. Kuznetsova kija asaya nung No 2 aser tarep asaya nung No.3 tonga asayaogo aser pa Billie Jean King Cup akokba Russia team nunga densema liasü.

BENDANGLI OSANG : Tapak 7 nungi...

Gaza City nung alir ajunga...

Qatar nung aliba Hamas yimten yimsüsür lenir kari atsü-anem katempa agizüktsü mulunga lir, saka par teloki nisung pua aliba atema parnok tashi kangabo mali.

Israel nungi pua bener aoba nisung 48 tang tashi Gaza nung lir ta amanger, aser yangji parnok 20 takum lir ta bilemer.

Hamas nung kar atema tetsükdaktsü long ji, iba sentong nung parnoki ceasefire tenzüker mezüng ghonda 72 tsüngta pua alir ajak chioktsüba ya lir, koba parnok asoshi kanga tongtipang lir.

Israel-i iba sentong sülen anidaktsü ta Trump-i shiaka pua alirtem chiokba sülen Israel mitkari operations tenzüksütsü ta iba telok yagi tamang makar, kechiaser taoba ita US-i ashi manga Doha nung tayimtsü amshia Hamas lenirtem tepsettsü merang.

Hamas lenir kari US aser Arab linük nungi sepaitem

"temporary International Stabilisation Force" ama Gaza nung yoktsü aliba nunga tai apur, koba yimya balaka nung amokbangba ama ajiteter.

Hombar nikongdang iba sentong mulunga agizükba sülen Israel Ato Kilonser Benjamin Netanyahu-i Gaza shilem kar nung Israel mitkartem alitsü aser Palestine linük ka kumtettsü anema tashiyim agi nokdaktsü ta ashi.

Ibai US framework anema lir, kong Israel sepaitem okshia ainshitsü ta shia lir. Palestine linük temeja ka mali tashi nok-nü metoktsütsü ta Hamas-i taoba mapang shia lir.

Hamas-i anir October 7, 2023 nü Israel south len maka nisung 1,200 shi tepseter ano nisung 251 pua bener aoba tayang kepzüka Israel mitkari Gaza amak tenzü.

Iba sülen Israel nungeri amakdang Gaza nung nisung 66,225 tepsetogo, ta yangji Hamas meyong health ministry ajanga ashir.

BILEMDANGANG

"Taitsübaji temulung melemtetba nungi adoker."